

四庫全書

史部

欽定四庫全書

史部

廣西通志卷十六

七

詳校官給事中臣鄧文泮

檢討臣德生覆勘

總校官進士臣朱

鈐

校對官中書臣

李

荃

謄錄監生臣

徐天駿

欽定四庫全書

廣西通志卷十六

山川

柳州府

馬平縣

附郭

仙奕山在城西南其石黑肌而赤脈如棋盤可奕
旁有巨人跡

駕鶴山城東南聳立如孤鶴臨大江舊有駕鶴書

院今燬

鵝山在城西二里隔江十里水自半嶺噴出流小河入大江遠望如雙鵝飛舞又名深峩山唐柳宗元有詩

天馬山在城南近大江高數百丈羣山中獨出峻拔山有楊文廣洞俗名馬鞍山

甌山在水南山形獨立廣百尋高五丈

天山在水南村後石壁上有天山萬里四字

石魚山在城南二里玲瓏深秀內多名人題咏下有龍潭

屏山在城南開展如屏故名宋陶弼有詩

奕貴雙山在城北二十里東山曰桃竹西山曰雀兒

鳳凰山在江南去城四五里

文筆山在城西二十里山勢卓立直上如筆

龍壁山城北三十里油榨村對岸石壁似龍形下

臨灘瀨宋陶弼有詩

雷山在城南夾道

鵲山在城北隅

四姥山在城西五里四面對峙

東臺山在城東下臨大江

背石山在城北

相臺嶺在城東北十里又十里曰將臺嶺

走馬嶺在城西綿亘二十餘里又一峯特起曰金

山

立魚巖在江之南與仙奕山對峙深邃奇怪內有三洞相通多名人題咏山腰有魚峯寺

鷓鴣堆在縣學前諺云鷓鴣堆起狀元歸

柳江一來自古坭一來自慶遠經柳城縣合流至郡又東南入象州界

鷺江即莪水在文筆山下會大江

黃陂水城西三十里源出黃吉山合鷺水入柳江

飛瀑水即鵞山所出者噴薄迴漩又名長塘

大龍潭在立魚巖之南雷水出焉旱則祈雨於此
有張忠簡公釣魚臺羅象三龍隱洞

小龍潭城南二里立魚巖下陸鴻漸茶經名為圓
泉

羅池城東有柳侯祠韓昌黎碑文

白蓮池在北關外池有九竅泉出其中

放生池在江之南有石壁懸出江面鐫放生祝聖

之池

靈泉城西七十里不涸不流

甘井在仙奕山下隨江消長雖旱不涸

城北井有柳侯銘

雒容縣

思微山在洛清鄉去舊縣里許有甘泉四時不竭
屏石山在洛清鄉舊縣西北十里峯巒高聳下有
石巖出泉

龍屯山在縣西二十里蜿蜒盤曲如龍故名

主山在北門外縣治倚之故名

雙童山在主山左

聚講山在主山右

雷村山舊名雷峒在縣北七十里

如來山在縣北七十里昔傳有神女出現頗稱勝地

平頭山在托定鄉內崙縣北八十里

大定山在洛斗鄉縣北七十里

橫賴山亦在洛斗鄉

雞站山在縣西北去平頭山十里

西眉山在洛清鄉縣東北八十五里

鷹山在舊縣城內

羅子山在縣西南三十五里

六寨山在豐軌鄉縣南三十里六峯聳峙山下有

二泉湧出民田賴以灌溉

謝八山在托定鄉外尚縣北七十里

馬蹏嶺在縣南四十里

高嶺在上羅鄉縣西二十五里

大墮嶺上羅鄉縣西四十里

六百嶺在豐軌鄉縣南五十里其西十里有大河
嶺又十里為大窟嶺

丙和嶺在縣東南六十里與平樂之修仁接界

白龍巖在舊縣東

白象巖在上羅鄉縣西七里有上中下三巖上巖
相傳宋狀元王世則讀書處中巖有石刻白象巖
三字又有二字如篆文磨滅不可識下洞有石刻
天然大廈四字內大士座前有藤二本約高十餘
丈上出石罅挺直如柱石壁刻有王相公詩
會仙巖在縣南五里蒼秀玲瓏下有碧潭

內外崗在托定鄉

洛清江在縣南自永福流入西南經江口鎮亦名

運江又南經馬平三江口合柳江下象州

三門江在縣西自柳州來至江口合洛清江下象
州達潯江

龍鼻江在縣西北源出柳城縣深山由洛斗鄉入
縣境繞城入洛清江

山道江在縣東自永福來會洛清江流至三江口
入柳江

羅城縣

鳳凰山在縣城北石壁峭立如屏山半有巖石古
稱為丹鳳銜書

直瀟山縣東北二里許高峯矗立聳出羣山之上
山半有洞名黃坭巖洞內塑佛像石乳倒垂涼氣
逼人夏可避暑值雨瀑布如珠縣治來龍發源於
此

馬山在縣南十里平地聳立羣山環繞其形如馬
為學宮向山遠望烟雲變幻

硯山在縣西里許卓立端正方平如硯從旁小山如水注後山環列如筆架

覆鐘山在縣北十里形如鐘覆

冰玉山在縣西北四十里色瑩如冰玉

葵山在城西

青陵山在縣西北八十里山勢綿亘通楚黔兩省相傳中多仙跡昔有人入山採笋遇一老人坐桃樹下摘實啖之歸已旬餘再往不識所在

中寨巖在縣西南山極玲瓏巖深不可測高難登
躋土人修石橋蜿蜒而上舊有雌雄二鐘其聲相
和歲旱禱雨輒應巖中產鴛鴦石

迴龍巖在縣東南巖徑幽邃昔土人避兵內有蛇
盤踞如蟒衆傷之後修溝洫不成衆始悔悟前蛇
或龍也塑佛巖中湏乃成因名迴龍圳土人利之
西江在縣西門外發源銀村資灌溉經西九里潛
地而行至慶遠農里復出合慶遠江霖雨泛漲水

壅難消冬涸橋北露方石如倉上鐫太平石三字
武陽江縣北六十里發源四堡經平西高懸二里
引下流至沙拱入融江傍崗河經布政里至寨登
村與江水合

聖水在縣西九十里出石硯山下

龍潭在縣東門外上有雷王廟歲旱禱雨響應

龍泉潭在縣西六十里新圍村潭深不測廣二畝

許灌田十有餘頃

柳城縣

青鳳山高百餘丈直入雲霄為縣案山

烏鸞山在縣南二里如鸞展翅江流遶其下有潭
澄湛徹底其石多黑

伏虎山在縣北四里山形似虎

西山在縣西

筆架山在縣東十里羣峯參差狀形而名

勒馬山在縣北對江舊縣治在其麓山形曲轉如

勒馬狀

雲蓋山在縣西二十五里高大峻聳雲起橫覆如蓋

穿山在縣西高百餘丈上有一竅明朗外徹

轆頂山在城北二十里山頂如轆蓋

文筆山在縣北五里尖銳而秀有如卓筆

銅磬山在縣西北十里一作磬山又名覆釜山頂

平圓倒垂故名

馬鞍山在縣西北

造化巖在縣東與筆架山並峙巖狀秀削巧若天

工

龍江相傳梁時龍見於江中

馬跑水在縣西七十里又名湧珠泉舊志謂諸葛亮南征過此馬跑出泉

鸞洲在縣西北漁舟皆泊於此

融縣

雲際山在縣北十里出雲必雨有翠玉寒碧二泉
鐵船山在縣西三十里遙望彷彿一船尾插絕頂
寶積山在縣東五十里產盧甘石及鐵

文筆山在城南二十五里南離並峙即古都峯

石梯山在縣東十里高數百丈勢極峻險

獨秀山在城西上有祖師臺

樂聖山在縣東六十里高於通邑諸山登之可望
柳州上有石池藏怪物

大旗山縣南二里梁吳二侯廟在其麓

石門山在縣西北十里兩峯夾峙江岸崖石峻削如門

聖山在縣北四十里有舜廟山高數百丈

銅鼓山舊傳諸葛武侯嘗埋銅鼓於此

九頭山在城西九峯相連

仙屏山中空洞有仙人石形如拱立

壽山在縣東五里有吳寶盧仙跡硃書壽山二字

至今不磨

羊角山在城南中有石室敞濶可容百人

攬口山在縣西北十五里連延數十峯高千丈深林密箐間出不逞為邑要區

天堂嶺在縣東北六十里有泉不涸

秦嶺在攬口山西高與之齊

老人巖在縣西南三里傳有老人拄杖於此登者俯視萬象如在雲際其下一巖尤奇怪蓄水澄泓

淵深莫測每風雨見有蛟龍出入云

韶潭巖在縣西北二里極宏敞夏涼冬溫可坐千人避寇者呼為小桃源

靈巖舊名老君洞上有白石巍然如列仙靈壽溪貫入巖下清響作環珮聲宋太宗頒御書百二十軸藏於洞改名真仙巖張孝祥磨崖大書天下第一真仙之巖

玉華巖在城西北四里下一石如虎上一石如龍

俗謂之龍吟虎嘯稍近有洞亦曰玉華光怪陸離
翠碧繡錯其石即鯉魚巖邃壑幽秀碧泉寒冽為
帶江之源

德巖即彈子巖產石甚圓形如彈子有石刻三字
劉公巖在城南四里舊名西峯宋紹定間郡守劉
繼祖命寺僧智性闢之因名

背江洞在縣西北二十里萬山包絡曲澗縈迴中
有江為邑要害

採藍洞在縣東北四山環列洞中平地如砥石上有硃書採藍洞三字

融江即懷遠容江一作潭江南流逕縣城東入柳城縣界會龍江至府城為柳江

浪溪江在縣東北一發源永寧州高望山一發源義寧縣大羅山西流至縣之撫羅二水會合又西至長安石旗口入於融江

李獲江在縣東北一名南江西北流至主簿入浪

溪江春夏水盛可通舟楫

寶江在縣東北源出懷遠縣南流入縣界折而西流入融江江深廣抵浪溪江之半

武陽江在縣南由羅城縣東流入縣界至新圍入融江

清流江在縣南西北流入於融江

高橋江在縣南四十里發源鵞頸鎮深山東流入於融江

帶江發源於鯉魚巖清溪溶演經城北環西繞南
東入融江為縣城天然濠塹

背江在縣西北其源有三右為思杲江左為通道
江中為都狼江會於大約鎮南流至攬口折而東
蜿蜒數十里峭壁深箐兩岸偪仄東入於融江距
縣城一十五里以江在縣城後故曰背小舟至思
杲江之門田都狼江之扶問淺不可進經背江岡
矜犇所居險惡殊甚

回回江在長安鎮西北二十里源出大田銅鑼山
東入融江

蔡邕江在縣南一里源出西岡都溝山匯於老人
巖下東流入融江

靈壽溪在真仙巖內其水穿巖而流相傳老子經
此以丹投水中飲者多壽

古鼎潭在城西南居半山中常聞潭內有鐘笛聲
歲旱求雨輒應

安靈潭在真仙洞後古安民居白日雷震陷成潭
有靈物栖止歲旱禱焉

落杯洲在小東門外世傳有異人落杯於此遂成
洲

丹洲為縣南水口

三星洲在縣南三里有三小渚如三星布列

藍洲在縣南水漲不沒昔有藍姓民居其上

都博塘在縣西南十五里寬百畝

長塘在上園秋冬不竭

懷遠縣

武牢山在桐木村後離縣九十里其峯尖秀如削
高出羣山上遠近皆見為一邑之望俗傳上有仙
亭仙桃等物人著意尋之弗見又呼為珍珠山

天馬山在縣治東雙峯平列前後兩駕縹緲相逐
如天馬然

鳳凰山在縣東南兩山對峙如鳳

珠玉山在縣南為邑案山

掛榜山在縣治西如平頭一字又曰一字文星

蒼帽山在縣北二里

大耀山在縣北十餘里

大貴山在縣西北猿人槃瓠種所居

羣甕山在大容江勇尾地

貓兒山在縣東曲逕迤迤林木陰翳西邊水出板

江東邊水出桐木合流

九曲山在下石門西山離城十餘里相傳有仙人
對奕石上有詩高萬仞怪石巉巖中流一泓碧練
千尺

龍頂山在獨崗至貴州黎平府五十里屬洪州平
價村交界

大傘山自林溪過稿舖長三十餘里山頂分界東
北水出湖廣綏寧西南水出縣界

石門山兩山峭壁對峙如門凡四一在塘窟之上

一在四江牙一在大容江一在沙坭

平山在縣北五里宋建平州即此地

唐朝山近接笏山在縣東北一百七十五里與湖
廣通道縣分界

獅子山在軍聽潭西其山形似獅子項下繫五銅
鈴昔傳有獅子現形於此

古坭山在縣北一百五十里峯巒環抱嵐氣凝聚
舊志潯江源出焉

扶勞山在縣治北

楓木嶺在下嵯龍

古平嶺由桐木過白果延袤二十餘里有十二

盤其高萬仞

大重嶺在塘窟之北與老堡交界

天鵝嶺在河裡銅鑼交界

牛郎嶺在江邊大里交界

太白巖在下石門右相傳太白謫夜郎時登眺放

咏築室於上

香爐巖在石門頂上相傳有仙人修煉於此遺跡尚存

琴瑟界離縣治四十餘里在武洛八薑進至獨崗青嶺界在永吉上崗沙坭村對河至綏寧縣三十里與西龍交界前明於此立堡

通天寨在大營崗黃土塘北接湖廣綏寧東接桂林義寧西南屬縣界綿亘數十里其高萬仞俗呼

為都天嶺

虎石在石門上東邊一石似虎形

出米石在軍聽潭西相傳昔有道士居此石孔中
自出米可食三五人

容江廣輿記作融江考貴州黎平府永從縣載有
容江水出曹滴司合清水江舊志載容江出清水
江由古州而達於老堡則實係容江無疑

斗江一自義寧縣灘頭過龍勝村流入一自湖廣

城步縣下都乃村合沙泥水流入由古坭陳村以達潯江左右二水相關故又名關江

西波江在縣北四十餘里自白雉山會合大江板江在縣北源出扶勞山入大江

古州江出黎平西苗地經石門山而南繞縣西又南入容江

田寨江在縣北三十五里由田寨丹竹諸村入大江

蕉花江在縣北出蕉花村自江口東入大江

軍聽潭在縣北三里深十數丈一碧萬頃四時澄澈

石門潭石壁對峙如門

古坭潭在潯江中有二聖廟

老堡灘即舊縣下自老堡右為潯江左為容江

馬鬣灘在潯江中最險上下用纜方可行舟

諸葛營灘在容江中直至古州接清水江

蠻石灘古為萬石鎮今廢

大容江口在老堡對面兩山對峙有三王廟神最靈

象州

鳳凰山在州東北北下里離州二十里山勢凌空如鳳飛狀

白面山在州南十里橫截大江中多白石俗稱掛榜山

象臺山在州西山下有石刻象真巖三字深處有白石如象

石鹿山在州正東昌化里離州八十里上有鹿池雷隱山在州東六十里下有仙女池風土記云天欲雨則此山先有雲霧

卧龍山在州東南六十里東鄉里徭山

天柱山在州東北七十里安山里徭山

聖塘山在州東北一百二十里安中里徭山熱水

出其下相傳昔有猿人攀藤而上見一池清冷可愛內有魚鼈桃李環繞且多猿猴

五馬山在州西二里奔騰跳擲如駿馬脫韁

筆架山在城南二十里又南五里為道士峯

石牛山城東四十里常有雲霧天晴遙見如牛形
文筆山在城西南二十里尖峯拔出如筆

石門嶺在州東十里

鷺鷥巖在州南十里有石如鼓呂景蒙名曰石樂

巖

三仙巖在州北十五里

金雞巖在州治南西鄉里離城二十里內有民居
象江即柳江流經城西溯流而上至江口分流右
至雄容運江界六十里左下永福江達蘇橋

熱水江在城東北二十五里源出黃田徭流入象
江

熱水江在州東北一百餘里出聖塘山下

凌田江在城東北二十五里源出濮泉流入象江
牛角江城東北十五里源出天蓋山流入象江
龍角池在北門內州署後舊立苑置亭稱名勝今
燬

仙女池在州城外天蓋山

濮泉在城東四十里松檜森羅水石交映

來賓縣

龍鎮山在縣治北一里高扶雲際為一邑之鎮俗

名三台山

金峯山在縣南四十里上有瓦寺為唐時遺跡釋氏所稱第一代祖宋紹興八年畱偈此山碑尚存字跡模糊難識

石牙山在縣南四十里平原有石峻峭如牙接貴縣龍山

居松山在縣南三十五里秀出羣山號曰文筆山頂有石盆仙鯉之勝

雙髻山在城東四十里山形相對如髻晚霞朝靄
掩映更佳

闕神山在縣城西三十里僧武志修煉於此每出
即駕青布為橋去地六七尺市人見而異之宋元
祐初飛昇而去載一統志

龍崗山在縣西十里雨餘星曉亂雲圍抱景最深
遠

思玉山在縣北四十里相傳有人得玉於此後再

求之不獲因名

雷山在城北三十里

八雲山在城西十里

賈利山在城東三十里

雙泉巖縣西北一百里有泉冬溫夏涼相傳昔人肄業其中常患無水忽一日雙泉湧出故名

石佛巖城西十里餘龍崗側石佛高丈許不假人

工

白雲岡在縣北三十里山水清佳為邑人遊宴之地

白牛岡在縣西南六十里中有白石狀如牛

大江源出滇南自遷江流經縣城西七十里至都泥江口合柳江歷武宣內有蓬萊黃牛古塔諸潭最稱險惡舟子動色相戒猶往往覆溺水入夏即紅頃刻漲數丈巨木枯枝與流俱下至秋深水乃定名紅坭江

定清江源出清水堡流經縣北合紅水江

雷江源出新慶村流入大江昔有毛雷捕魚於此
因名

牂牁水流經縣西合紅水江

白馬溪源出白牛崗流經縣南入大江

蓬萊島在縣治下水十里古州治所在山光水色
映碧浮青頗具勝槩

慶遠府

宜山縣

附郭

宜山在府城北龍江上唐名宜州以此山舊有飛來廟

北山在城北一里唐陸仙翁修煉於此常有紫雲玄鶴乘空而下如神仙之會故又名會仙中有白龍崗潛通南山龍隱又有崔莫二仙姑煉丹所旁翼青鳥硃砂兩山巖前石若觀音其上石井曾出並蒂蓮花即稱為玉井云

盧山在城北二里對府治後

天門山在城北一里二峯如笋聳嶺參天亦名天門拜相山上有馮京祖塋又呼狀元山

龜山在城北三里其形似龜故名

九龍山在城西南六里山多崗竅內有石田崗口

一潭深不可測因禱雨響應立廟祀之又有丹霞

巖宋刺史張自明卒棺昇於此石開自合上有丹

題仙跡

南山在城南五里其巖軒敞如屋後洞曰龍隱有石龍鱗甲宛然前建廣化寺左為白雲巖係盧僧德洪脫化處又有宋真宗御書閣旁建三賢祠祀黃太史庭堅余襄公靖馮三元京東畔石鐫余襄公畱題真跡

日山在城東北二十里隔江與月山對峙以其特立而圓故名

月山在城西二十五里其形肖月風土記云東有

日山西有月年年征戰無休歇幸得西水向東流
世代永無憂

鶴山在城東南二十里上有石色白如鶴

鰲山在城東南二里

大號山在城南二里高可遠眺上有宋趙清獻公
放鶴亭故址

文筆山在城西德勝鎮挺秀如筆突聳雲端

屏風山在城西八十里巖貫胸腹上有道觀梓潼

閣懸梯方達

香爐山在德勝鎮西鼎足屏風文筆二山

羊角山在河池所西五里其麓有宋楊文廣故壘
大曹山在城東四十里

小曹山在城東二十里

九子山在城東二十里九峯排矗鎖龍江水口一
名九頭山

青鳥山城北一里會仙山東相傳古有青鳥飛至

產異草

朱砂山在城北一里北山之側

桃源山在城南三十里係吳仙葬處

鐵城山在城北二里

馬蹄山在城南三里形若馬蹄

壽山在河池所治東北有三寶寺朱僧脫化處

韋家山在城西四十五里

獨存山在城西七十里

謝表嶺在城西五十里傳楊文廣得勝回朝於此
拜表故名

棋盤嶺在城西八十里

冷煖巖在城北一里洞達山腹前冷後煖

青靈崗在城東二十里

古城崗在城北青鳥山後一名紫霞崗崗七曲有

文昌像

觀崗在城西二十里其崗靈異有西原太子祠

龍江石筍嶺灘門險激發源貴州都勻府自獨
山州流入經府西北諸蠻峒會思荔諸水東南流
至縣北折而東入柳城江匯融象下潯梧水勢宛
轉如龍故名

小江在城東北六里源出天河合龍江下流

洛蒙小江在城南六十里流入龍江

流馬江出永泰里山洞東北流合龍江

默流江源出龍門水由地行至碓目里黃猱里主

寨黑洞四分獨山中通馬泗東流彭嶺灌養三處
之田

飲軍池在城西宋軍校陳進叛圍城久涸一旦復
湧居民賴之曹利用飲軍於此

放生池在舊城東門外即古樓塘宋時凡遇聖節
買生物放之以祝無疆故名

龍泉在城南二里其水重於他水黃山谷稱之果
然故又名重泉

蓮花塘在府學前

龍塘在府城南二里旁有龍母廟

宜江井在城內城隍廟西與龍江水相為消長

河池州

智山在州城南四里高聳入雲西連吳山筆架三
峯並峙唐時建智州於此

火燄山在州城南五里其上一石宛如紗帽又名
紗帽山

鳳儀山在城北四里勢極險峻州治半枕山麓

屏風山在舊州城北峯峩環繞如屏之峙上建觀音閣山半有泉盛夏溢流今泉仍而閣廢

四一山在州北五里近州舊治倚屏風山

馬鞍山一在州城西北三里一在州西南一百二十里那龍河出焉

東山在州東四里挺然獨立又名樂教山

智州山在城西四十里盤紆綿亘唐建智州因以

名山

太平山在城東五十五里金城江邊石上鐫有天
下太平四大字

鬼人山在州東三十里內有深巖嘗吹響器路旁
有石棋盤仙人腳跡相傳曾有仙人於此奕棋

楊村山在州東南十里有巖曰龍巖洞口甚小止
堪一人出入內寬濶深遠可容萬人有石成龍形
鱗甲光亮如金色又旁有石佛名曰佛巖

吳山在州西離城六里

移嶺山在州北七里崖岫最為峭拔

劍甲山在州城南一百十里下岳村小路西通鴨
崗

洪鹿山在州城南九十五里

邕帶山在州城東九十五里古雲里東通安定司
振人山在鎮南里洪鹿山之南洪龍江出其下

定南山在板村去城南百二十餘里相近為乾山

都銘山在州城東二十里舊名都猛隘

雷山在弄郎村與邕上山相近接東蘭界上有關
堡

魚躍山舊州城東北一里稍南有新月山祥雲山
三山並列蒼翠鬱然

北會山在州城南一百二十二里

白馬山在州東二十里

邕上山在州城南一百二十五里九門村北

天馬山在城南近接劍甲山

鼓兒巖在州城東五里巖甚深邃內常聞鼓聲

金城江在州城東五十五里自荔波縣流入宋置
金城州即此江南岸石名喇街東里許有石如盤
南來溪流其上日夜鳴嘯

靈淺江在州東南源出鎮南里合洪龍江

洪龍江發源振人山東流入永順合刁江

那龍河在州南百餘里源出馬鞍山流入永順司

合刁江

喇索河在邕學平村西通大郭村

秀水在州治前東流繞十餘里伏高山下至六甲里復湧出合金城江

猫溪水在州西南源出高峯坑東流合秀水

古浪溪在州城東南二十五里一名乾溪渡折西即三旺大路

白崖飛泉自州西南四面入山又西三折而至白

崖北面高可二十丈泉自崖半掛下如足練北流
過州而東即秀水

天河縣

甘塲山在城東二里形如幞頭縣治依其麓

鳳凰山即鳳頭山在縣東三里其形似鳳昂首

東山在縣城東一里石壁峭立儼如屏障縣之龍
脉發源於此

榜山在縣西三里形如掛榜

南山在縣南二里與東山對峙翠巖危峯高出羣表其上有泉甘冷

穿山在縣城西五里石竇中空故名

獨俊山在城北二里山峯秀靄挺然獨立不與衆山連故名

交椅山在縣西三十五里其狀似椅

文峯山在城東十五里高聳接天啟通邑人文之秀

高寨山在縣城西四十里峭壁危峯洞門軒豁

石獅山在縣北二十里砥柱兩江形如獅子

北陵山在城西十五里山麓有水泉澄澈昔吳生
師事陸仙翁修煉於此

烏山在縣城西峯巒高峻頂有泉居民曾因險築
寨於上相近者曰聖水山

植福山在縣東北二十里山勢高聳綿亘數里縣
之鎮山

聖水山在城西三十里

涵樂洞在城北一里深邃可避炎暑有石如鐘鼓扣之則鳴

龍門洞在歸仁里水通下流望之如天門洞深奧杳不可測

喇冲洞在縣城北三里外敞內深中有清泉四時不竭其下有龍潭禱雨立應

通天洞在城北三里四面昏黑翠壁蒼然惟中一

穴通天故名

容樂洞在城西十里景奇而秀路險而安遊人樂之

三崗在城東三十里稍南有黃甲崗

九龍江在縣城東二十里源出龍泉勢如九曲聯珠歲旱禱雨立應

東北小江在城北二十里一自三崗一自黃甲崗發源合流入小幕寨麓注為縣北江水

三潮水在縣城西十里水從巖際湧出一日三潮來則漲滿退則其流一線可以灌田民受其利因名聖水立祠以祀之

思吾溪在縣東南二里流入宜山縣合小江水入龍江水聲晝夜不絕春漲尤甚

思恩縣

旗山在縣城東南十里

紺山在縣城北三十里以其山色名一名扞山謂

可扞蔽縣後土人以山嶂重疊日光罕見故又名
曰暗山

龍門山在縣南五里峯巒聳秀雲霧朝興靈雨時
應祈禱歸焉

嘯山在縣西四十里巖竅玲瓏風響谷鳴如長嘯
然

修煉山在縣南十里相傳唐時陸仙翁修煉於此
三峯山在縣東二十里三峯並列下有石巖洞寬

五六丈泉自中出引流溉田

覆斗山在縣城南二里

三僊山在縣城北四十里

入懷山在縣城北八十里

望峯在縣城東一里枕脈寒坡嶺迤邐而下高登
遠眺帶水千峯歷歷在目舊有文漪亭

天門峯在縣東北二十里萬峯襟帶惟此最為峭
拔山腰一穴如門橫深三十丈有石柱如龍形天

欲雨則水如注俗云天門洞道通一線攀緣而上
內可容二千人徭民恃險常避亂居之

疊石峯一名斧劈峯在城北二十五里如片石層
累高可千丈

米嶺在縣城東三十里為入縣門戶諸峯羅列如
聚米狀上有老鼠隘高五十丈險窄莫比

寒坡嶺在縣城東五里入縣孔道高可二百丈舊
志名寒山土人云寒坡以高峻多風炎方行人宜

之

回頭嶺在縣南三里其勢北旋如顧縣治

覃嶺在城西五十里

龍巖在縣城南五十里有洞深邃

環江在縣南六里流經縣西又東南入宜山界即

龍江上源唐環州舊治在焉

帶溪在縣北四十里源出荔波其水旋繞如帶南

流入龍江中有砥柱石

中洲在縣東北一百五十里平行一大沙洲如海
島

漣漣泉在縣西五十里水不常出行者遇渴求飲
佇立呼之乃出

東蘭州

思榮山在州東三十里

真武山在州東三十餘里紅水河東岸

都夷山在州東三十五里高峯插天最為險隘古

稱都夷縣以此

青雲山在州西四十里

雙鳳山在州北二十五里

福山在州北三十里

印山在州東三十里

隘洞水在州東北即紅水河又名烏泥江自那地
州流入又東南經思思之都陽安定諸司入忻城
界水勢洶湧昏黑直等黃河

荔波縣

雍正十年
改隸黔省

方林山在縣城北三十里山峯層累

永長山縣城東北六十里山勢綿亘

水巖山在縣西五十里下有水從巖中出四時不

竭

白崖山在縣東南舊縣城東

分水嶺在縣北與貴州獨山州分界

勞村江一源出古州苗地流入縣之鴛浦由周覃

水春舊縣巴灰董界匯歸勞村歷一百四十里一
源出黔省爛土司流入羊安由方村新縣冲芒匯
歸勞村約二百里並皆峭石險灘不通舟楫由勞
村合流暗入山巖抵思恩縣界徑達金城下龍江
那地土州

虎山在州南十二里體勢蹲踞如虎相近有兜婁
山又南三里曰紅山

翠靈山在州西四十里

翠屏山在州北七里危巖峭壁高入青空

巴羅山在州西六十五里有水出其下曰巴羅江
掛榜山在州東六里形若張榜

馬山在州治西

屏風山在州東南八里

感見山在州西南五十五里

唐帽山在州東二十里

感安山在州東十三里

折登山在州東北二十里

登龍山在州東北十里又二里曰巴陵山

屏山在州西十一里

暮曉嶺在州西五十六里左襟巴羅右帶紅水

懷峽嶺在州西六十里

磨石嶺在州北二十五里

黃花嶺在州北一里

方環嶺在州東北二十里

壘方嶺在州東北十五里

龍泉寨在州西八里有龍泉入烏泥江

思廉寨在州西四十五里烏泥江右畔

丹州寨在州東北六十里

烏泥江源出泗城流經州境一百六十里入東蘭
界

平細江源出翠靈山合烏泥江

巴羅江源出巴羅山巖合烏泥江

南丹土州

金雞山在州東二里蒙寨南紅盆之水三面經流
迤邐過北

長春山在州南三里層巒連嶺又為青雲峯青雲
之水出焉

三寶山在州西三里

秀靈山在州西二十七里奇峯怪石傑出巒岨

孟英山在州西三十里產銀砂明時曾開礦旋罷

役

都利山在州南二十五里山泉飛注為大江源
蓮花寨在州西南九十里

邕戕寨在州西一百二十里山峯危峭斜接泗城
思恩邊境要害

紅盆水源出秀靈山下過金雞山至沙界坑二十
里入山而沒

大江水在州南二十里發源都利山流下大山入

河池州界

青雲溪在青雲峯下過大橋與紅盆水合東流入
山

忻城土縣

龍塘山在縣西八里山有塘龍常潛此

疊石山在縣北四十里層次宕堯石如累砌

馬鞍山在縣北三里形似馬鞍

張帽山在縣西十五里

夜崗在縣東十五里有巖深邃不透日光故名

黃泥崗在縣北十里

烏泥江在縣西六里自東蘭經安定夷江流入縣境下遷江

東蘭土州

十八鶴山在州東三十里

九曲山在州東三十五里

九曲水在州東北源出九曲山繞銀海池下合紅

水河

銀海池在州北八十里

永定土司

頭盔山在司東南七里半山有數白石懸巖前形如頭盔

石魚山在司西二十里有石如魚形

旗桃山在司北十里

莫往崗在司西南八里峯巒險峻

清潭崗在司東北二十五里

小水源出永順土司流經司境入忻城界

永順正土司

高椅山在司治前高聳約百餘丈

多靈山在司東北八十里突然三峯有飛泉石印
仙人足跡大如箕遠可眺數百里有羅漢巖四時
花果異桃一樹人可食不得懷歸有泉隨飲者之
數不盈不涸尤為奇異

七星山在司東南三十里

清遠峯在司北十里景物怡人翛然塵表

刁江源出河池州三旺流經司境會合烏泥江

永順副土司

卧虎山在司北十里其勢蹲然宛如虎卧

天馬山在司南一里其狀如馬

回龍山在司南一里其形如龍故名

小水一自羅城縣孟江口一自柳城縣西山一自

思營里流入至司南合流又南經宜山縣界入龍
江

廣西通志卷十六

欽定四庫全書

廣西通志卷十七

山川

思恩府

蜿蜒山在府治北山勢起伏環抱府治四時蒼翠
如畫屏中有仙巖又名筆架山

獨秀山在舊城東一峯特立不與羣山相連

大明山在府東高峻綿廣界抵上林武緣

崇武山在舊府西北高峻為一方巨鎮

將軍山在舊府西遠望如武士特立兩峯峙其左

右

獅子山在舊城後形似伏獅前有圓阜如毬

仙女山在舊府城中前有池其水光如鏡俗云仙

女照鏡

蓬山在南海里下有碧泉

安山在城北十里郡治屏障土人云暗山

仙跡山在南莊上有池水

人影山在紅水江之右半山石壁上若有人影

定武山在府東南與教場相對

三寶山在舊城西

三台山在舊郡學宮後

鷹山在舊城西北臨江屹立

玉印山在府城東四十里石山森列攢聚中有方
平如印者上附一小石龜如紐然壁間有古刻砥

柱二大字又玉印二字乃知府吳鼎鉉所題土人因以名山達泉出其下

靖遠峯在府東北八仙堡明弘治中官軍討岑濬登峯頂以望賊氛事平因名

天鳳嶺在府東門外勢起如鳳

黃嶺在府東四十里為武緣縣發龍之祖

琥珀嶺在府東四十里山頂雲覆三朝即雨

璞嶺在府東四十里形如覆鐘

滴玉巖在舊城西

通天巖在舊城西

栖霞巖在舊城西門內巖中虛敞烟霞隱映

白雲巖在舊城東北十餘里有泉自巖出流成溪
澗

獅子巖去城十里山勢蹲踞如獅子巖洞玲瓏石
乳凝結物象不可名狀東南絕壁有烟霞深處四
大字筆力遒甚不知時代南面有清虛洞三字西

南有別一洞天四字稍內有陽明先生過化之地
八大字皆蒼老為明人書又洞側有小石巖刻藏
真石室四字乃蓮花峯山人筆題咏頗富皆在懸
崖莫能探記

牂牁江一名右江發源雲南由剝隘流入土田州
經奉議上林下達南寧府與左江合下廣東入於
海

紅水江一名紅江河發源雲南由西隆州入界經

泗城東蘭等境自羅墨渡出流慶遠府與柳江合
下潯州與左右兩江會流

府江自府東西二溪發源流白范村下與武緣縣
西江合流

馱蒙江源出那馬司界閩標嶺東經鷹山下至府
北四十里亦曰清水江又東北入紅水江

東溪發源自府東北流繞城東與西溪合流

西溪發源府西北至城南與東溪合流入府江下

武緣

通津水出城中合喬利達清水江

達泉在府東四十里玉印山石澗直達大鳴山崖故名達泉

湧泉井在城東北三里水出小阜一日三湧味甘可汲名曰惠泉

武緣縣

大明山新建伯王疏草作大鳴山又名鑊鉞山一

統志云延袤三百餘里武緣諸山最高峻者此為
首上有風穴下有廟甚靈

伊嶺山在縣南三十里樂昌一圖有村墟上巖洞
極深邃宋嘉定間周師慶結菴修煉坐化巖中有
古刻詩像銘贊後人題曰望仙巖

起鳳山在縣東南十五里突起兩峯軒舉如雙鳳
上有飛來寺古刻石上蓮花字跡尚存

暗山在縣南三十里兩山相夾林木深阻昔儂智

高嘗結壘於此

思鄰山在縣東十五里昔有何鄰得道百餘歲隱此山後不知所適人思之故名

黃道山在縣北二十里有巖黃道人修煉於此鄉人立觀祀之今圯

帽山在縣南一十五里其形如帽

郎山在縣西北六十里狀如人立

都決山在縣西六十里嶙峋高峻登之可遠望又

有房山耳山俱在其下

崢山在縣西北七十里上有泉甚清冽

榜山在縣南二十里形如掛榜

武臺山在縣東四十里形如半月為諸山之秀

茅山在縣西三十里

潘山在縣西六十里山頂突出二石狀如人立中

有泉不涸

華蓋山俗名岵嵒山縣西七十里
有巖曰感仙巖

中甚幽敞

劍脊山在縣西北六十里狀如劍脊中有隘路

南山在縣西北一百三十里三潮水出此

獨秀峯又名印笏山在縣南五十里突起一峯如
筆高數十丈

高峯嶺在縣南五十里嶺南為宣化縣界通南寧
要道高二百餘丈周一十五里山峯險峻路徑崎

嶇

國朝康熙年間思南協副將王三華捐俸修平行旅
稱便

天井嶺在縣南二十五里山頂有井相傳儂智高
戰敗崑崙西奔人馬俱渴跑石窩拔劍穿之水出
劍痕馬跡尚存泉名天井泉

紫金嶺在縣南二十里有儂智高營壘遺跡嶺
傍掘井得古藏紫金故名

長嶺在縣西十里路平如砥

韋公巖縣東一百里相傳韋將軍征蠻有功終於
此鄉人立廟祀之

仙女洞在縣西南五十里樂昌四圍石巖深敞三
面皆石壁上有古題朝天巖仙女洞六字墨跡猶
存

七星坡在縣南三十里形像七星

南流江源出大明山之淥黎由歐村韋村合下沙
博澁二水經綠布江口下黃下洞會西江出宣化

入大江

西江源出大明山之劍江流五百餘里至縣西門
通舟楫會南流江至隆安縣杜柴村分界至江口
合大江

那楞江在葛墟北紫金嶺右流出鄧橋會南流江
靈水在縣南二里江底平石源泉湧沸夏月江漲
潦濁獨此水清澈日光薄射五色晶瑩上有元帝
廟祈禱輒應一統志云昔有靈犀出岸頂有光彩

故以靈名水口出南流江

三潮泉水縣西一百三十里源出南山前有廟相傳當年水一日潮汐者三

咻排水在縣東北十五里由黃道山流出東橋會南流江

龍窟在縣東四十里深不可測土官岑瑛砌石城立廟其上一名羅坡潭

潘山泉在縣西潘山下泉流滑滑四時不涸

應衆泉在六楚橋西通縣之永寧路

楞色泉在永寧境四時流注清澈不竭

楞環泉在永寧七圖中多魚

布雍泉在葛墟北水色清綠如錦相傳宋治平中下有伏龍一日雷震石裂龍忽飛去

水提井在近蘇村水出石竅中澄泓如鑑

賓州

南山在州城南四十里為州治案山

馬碑山在州城南二十里上有鍾馗遺像

金雞山在州城西二十里相傳昔有金雞棲此

石壁山在州東三十里

白羊山在州東與石壁山相對

仰婆山在州城東北約三十里

領方山在城東領方古郡縣名因以名山

仙影山在州北傳有二仙女遊此

武淥山在州南

雙山在州東兩山相對

古漏山在州西四十里有泉如滴漏四時不竭

鎮龍山在州東南八十里高出羣山綿亘百里

登臺山在州西南八十里高聳為諸山之望又名

天柱山

銅泉山在州東十七里下有神祠

羅鳳山離城十里形勢如長蛇即州之後屏山

社留山在城南七十里

淶里山在城南六十里

馬鞍山在城西五十里形勢如馬鞍

圓珠嶺州南門外大江環流其下

勒馬嶺在城北三里又北二里為斷嶺

銅鼓嶺在城東南三里

青嶺在城東南四里

相思嶺在城西北三里

南蛇嶺在城東北十里

廖平巖在石壁山旁清勝奇絕昔傳釋氏六祖常
憇巖中

甘村巖在州西南二十里中極幽深下有潭水

葛公巖與白村巖近石壑深邃晉葛洪曾遊避暑

白村巖在州西南舊傳巖中有道潛通武緣今塞

李依江在州城東三十里源出瑯琊鄉

武陵江在州東南三十里源出武陵山

臨浦江在州西二十里北流入思覽

丁橋江水一自州南淶塘山一自西南上林界山
穴俱係細流下至丁橋塘匯為一江流出簡村

思覽江一名四覽江賓水即此在州西源出大明
山細流過邦光隘近鄒墟小舟可入

東恢江水自州南馬頭寨小流出武陵三團下注
入江

官橋江在州東細流下出陀山村合鷹埠江

鷹埠江源出州東南鎮龍山細流經雙山下至龍

龔園曰龍龔江再下至膺埠園即曰膺埠江東出合鄒墟大河

古漏水在州西源出古漏山下流合賓水李依江入都泥江合大江

寶水在州西南三十里源出上清里北流經州東入思覽江即賓水支流

馬潭塘在州東二十里遇旱禱雨於此

白鶴泉在州南三十里源出南山

鯢寨泉四時常溫

遷江縣

掛榜山在縣東半里過江東岸形如掛榜綿亘十里為一邑屏障

淡竹山在縣南八里

印山在縣西過紅水江三里形如金印特峙為邑後峯

鷓鴣山在縣東南過清水江十里山形如鷓鴣巖

谷險峻樹木叢雜亦名白鶴山下有洞曰白龍洞
相近曰佛頂山

紗帽山在縣東南過清水江六十里與貴縣交界
內有巖可容百人舊為大林諸賊伏匿之數

古黨山在縣西五十里唐書有黨州即此

萊山在縣東南五里

雙髻山在縣南十里兩峯並合

泊艦山縣西北三十里石筍奇特行舟可以駐觀

鐘山在縣北一里下有巖

邕梧山在縣西南三十五里

永昌山在縣東北四十里

烟合山在縣東北二十里時有烟雲變幻

虎山在縣東北二里

寶積山在縣東疊石崔巍不通道路山頂稍平鄉人常依以避寇

甲山在縣東北五十里

朝山在縣西四十里武節水出此

石牛崖在印山側相傳有牛盜食橫州永淳田稻
夜盡百畝土人跟隨至此牛遂隱入石壁乃募匠
煮油且淋且鑿石裂牛現碎之今牛跡油痕尚存
遇仙巖在印山半腰巖口僅方丈光明再入則幽
暗傳有樵者避雨見三仙相奕遂構亭名曰望仙
土人或有災祲禱之輒應今廢

瓦山巖在縣西十里即龍江縣舊址上玲瓏光徹

可容百人下勢平坦堪居牛畜民環住山下凡有
警即入巖避之

黑崗巖在縣西南四十里不甚高有路可通石筍
林立傍一石盤玲瓏奇巧池一時有金色魚土人
欲鑿其盤忽見巨蛇蟠踞人莫敢近又一石磬扣
之清響可愛凡遇蚺蛇出曝年必旱每以此驗豐
歉

駕鵞窩在遇仙巖內幽處產石有雌雄不可以火

取伏行暗捉或一二對回磨如錢厚見黑點即止
將碗貯醋雌雄各一方徐徐近合因名相傳婦女
佩之不孕

清水江源出上林至城東北合紅水江流下來賓
達潯梧東粵由江口轉江通桂林柳慶其魚梁灘
最險大船難進小舟僅可達上林鄒墟

紅水江亦曰都泥江源出貴州穿山瀉至城東北
會清水江合流而下秋夏水紅黃難飲春冬水清

上有灘十五處高險無比

北三江在城東北五十里一源出忻城土縣板黃村一源出北三牛蠟村至那寺村合流直下具北三各村環兩岸居民多引以灌田入紅水江下來賓

龍降江在縣南二十里一源出自上里石疊村一源出自中流村至清水江合流而下相傳白龍下飲因名

賀水在縣西南四十里源出芭梧山又武繩水在其北源出黑洞巖皆東入清水江

武節水在縣西南八里源出朝山東流入都泥江黃牛灘去文輝塔下水七里紅水江中突出一石如黃牛沸浪潑天舟行稍不慎輒壞

日瀑灘去文輝塔二里源出北四感舊村至剝峽山會紅水江合流江口灘高丈許水勢飛奔驚濤虐浪形如瀑布

銅鼓灘即黃牛灘尾也水甚險右岸一石水洶擊之如銅鼓聲

北府淵附城東北隅即清紅水分界之處上有灘頗險下即深淵灘上每年水漲堆沙成坡如傍城岸則來歲主豐或傍榜山岸則來歲主旱土人常以此占驗

上林縣

鑛錫山在縣西南傳云昔有樵者入山得古劍因

名

羅父山在縣南二十五里突兀巉巖昔傳羅父入山採茶遇仙於此遂移妻子家焉

八角山在縣北五里一名扶嵐八山分矗

雲陵山在縣東唐邑人盧六修道處

羅勾山在縣西六里山勢盤曲如勾

思鄰山在縣西十二里道者何鄰嘗隱此詳前武

緣

雙山在縣東二十五里

獅山在縣東與螺山隔水並峙

螺山在縣東五十里平地特起旁有獅螺江

古淥山一名古麓在縣西南二十五里上有石壇
號仙殿宋雍熙中有盧氏登山採藥遇仙於此下
有古淥水

磨山在城東四十里

石光山在縣北十里日照山石有光

茶山在上林鄉產茶味佳寰宇記謂之都茗山

馬陂山在縣東四里北江徑其下

金雞山在縣東南六十里

羅密山在城東四十里

文梁山在城東四十里

旗山在八寨

雞籠山在城東南

止輦山在縣東平地突起圓阜形如輦

高眼山在城東南其山最高林木深鬱

大明山舊志作天明山在縣治之西延接武緣層巒插霄青翠奪目飛瀑懸崖人跡罕到為邑之靈境盧莫二仙化身其上

石蓬山在城東南中有巖洞容數百人小江穿石罅水清碧多魚

魚峯嶺在縣東

爭光嶺在縣東一名章光嶺俗稱嶺夜有光與大

明山相映故名南北二江合流其下

莫山巖去縣四十里內有潭

羅洪崗在縣治東北為前賢羅洪隱居修煉地崗內石臺石床古蹟猶存距城八十餘里接遷江之

毛崗

智城崗在縣東二十里唐韋厥隱居處

白雲崗在縣北三十里宋白雲先生韋旻居此

巷賢崗城南四十里

南江自大明山發源而來至章光嶺與北江合流
東注於澄江

北江距城四里自古零土司發源歷十五里與南
江合而東注其水潞洄曲折由鄒墟達遷江

里仁江在縣北十五里周江之水下流與合入馬
陂

周江在縣北二十里源出茶山

黃龍江在縣北源出羅勾山

馬陂江黃龍江水下流經馬陂山陰曰馬陂江案
舊圖志皆北江

澄江在縣南二里源出大明山入馬陂唐澄州以
此名

樊廟江源出淶七隘東北流至縣東三十里匯流
入大江

龍母江亦名龍馬江在縣南三里源出高眼山

化龍江在縣南八里源出淡竹山亦曰淡竹水亦

曰單竹江會流馬陂

周利江在縣南十五里源出縣西南界與化龍江合流入馬陂案舊圖志皆南江

明鏡湖在縣南其水清澈亦入馬陂江

田州土州

雲瓶山在州西北其形若瓶

八面山在州西周圍多樹木

萬山在州西峯巒層峙溪壑連綿數百里

屏風山在州西峯巒排列若屏

鞏山在州東北羣山對峙若門俗稱門為鞏故名

鞏山

隆山在州治東北百里田之高山惟此為最

邕馬山在州北峭壁上一微徑有石穴十二清泉湧出

橫山在州東南十里山勢蜿蜒橫亘故名

烏龍山在州治東北二百五十里

邕野山一名邕社在州西北曼衍而東連亘百餘里

飄嵐山在州北九十里其上有泉

縣山在州北一百二十里里定之水穿其中以出剝沛山在州東南四十里剝沛之水出焉

那兔山在州西南二百五十里那兔水出其下

卜崗在州東北一百八十里卜水出焉合篆溪而注入紅水河

扶頭崗在州治西南二百里其中有泉

罕豈坡在城西二十里明岑紹建嘉樂亭於其巔

今廢

巖長坡在州西南一百四十里上有泉

右江由雲南富州東流入州境至百色市合泗城
水又東合砦歐溪又東經州治西繞南又東合練
溪又東入上林界

紅水河源自滇中由泗城那地東蘭繞州東北界

萬洞溪在城西二十里其水深濶居民常漁於此
若溪一名馱命水源出鎮安府由奉議州流入州
東南界注於右江

砦歐溪源出萬山西南流注於右江都陽安定諸
土司下遷江又泗城水源自泗城府流入州界至
百色注右江

那兔溪源出那兔山西流注於右江

剝沛溪源出剝沛山北流注右江

練溪源出武龍山繞州治西北注於右江

冷水溪源出隆里山西流百餘里轉南合練水注於右江

隆溪源出隆里山東流注於紅水河

里定溪源出里定山東流合隆溪注紅水河

篆溪源出東蘭州由篆里東流注紅水

那霸泉在州西五十里四時不竭

沛瀾泉一名皮瀾泉在州東一百里其味甘冽

器坡泉一名大篤泉在州治東八十里

罕豈泉在州治西二十里

那水泉在州西北十里

上林土縣

那造山在縣南山勢層層茂林叢棘鳥獸所居人跡罕至

筆架山正東離縣署二里

局豐山在縣東七里

隴坡山在縣東十里

邕暗山在縣東十里

琴地山在縣東南十五里

感錢山在縣南二十里接果化州界

枯陋山在縣西南三十里上有小池水清如鏡四
時不竭與佶倫土州接界

蓮花山在縣西南三十里巉巖峭壁遠望如蓮花
雷矮嶺在城西山巒高聳東西穿徑皆黃茅青草

行人無所安憩與向武分界

質利嶺在縣西南山中無樹木

懷喜嶺在縣東南無樹木

平葛嶺在城西北又表割嶺在東北與土田州分界

右江自百色田州流下經縣前歷果化隆安至南寧是為左江右派故曰右江

大含溪在縣北源自向武州流入境東注於右江

大羅溪在縣南源自向武州流入境注右江

白山土司

九兒山在司治西遠望如嬰兒排列

獨秀山在舊司治之東接武緣界詳前

筆架山亦在舊司治東起伏三峯如筆架形

九娘江在司東南相傳昔有九女渡江驟水衝去

因名

小溪在司治東源自下旺地方流至秋冬淺涸春

夏泛漲

興隆土司

掛榜山在司治北二十里平遠蒼翠狀如懸榜

旗山在司東三十五里石壁上傳有羅隱題刻旗
山帶水四字

暗山在司南六十里林木深鬱舊傳雖晝行必以
炬炬滅則暗如黑室

雞籠山在司治西南三十里昔人見有雞棲嶺上

天將曉輒鳴

七首山在司西二十里高嶺峭壁起伏七峯似七人首相傳古姊妹七人學仙於此冲舉而去

鳳凰山在司西五十里山勢翩翩宛如鳳翥

黃磬山在司西二十五里一望黃色如樹幟然

清水江在司治東北自安定刁河隘流下合紅水江一線澄清水色不雜

七首水在司西南從七首山下流入紅水江

雞籠水在司治南水自雞籠山下流入府城河

那馬土司

邑旦山在司西北十里峭壁插天中有石洞幽迥
俗祀真武於內

丈胡山在司南五里尖峯突兀連接武緣邑頓村
峩山在司西北十五里

蘇埠山在司西南五十里

闡標嶺在司南四十里與武緣之永寧地接嶺勢

高峻

六部嶺在司南十五里接白山思黎城山勢高大
超出羣峯

砦崇嶺在司北一里山勢嵯峨如屏障

穰企嶺在西城十五里

穰企水自石穴湧出由上下馬安城頭流入舊城

邑橙村春夏汎濫田畦多資灌溉

砦山水發源石穴逶迤而下至淶都城頭與蘇埕

水合流

蘇埠水從坑塹仰出流至淶都城頭與我山水
合遼周鹿城頭東出興隆界入紅水江四時不涸
田無旱虞

定羅土司

感土山在司東北五十里秀麗清幽中有巖穴若
有風雨其頂先出雲氣遇旱歲人皆仰占

獨鳳山在司治北三十里形如孤鳳

將軍山在司北三十里一峯高出怪石巉巖與那馬交界

三架山在司南三峯尖聳形如筆架故名

大成山峯巒秀拔峭立雲表樹木蓊鬱司治建其下

羅漢山在司治北屹然聳峙石壁間刻有羅漢山三字內有羅漢洞及大士巖詩刻甚多

玉屏山在司北二十五里四面削立高可百仞

中天嶺在司西南二十五里高約百仞頂上有泉
橋傍水源出中天嶺北經損城頭東出鞏橋又經
傲城頭之東與架溪合

架溪在司北三十里自舊城司流入經架城頭南
又東經傲城頭北折繞出那馬司界入紅水江

產溪自舊城司流入經鐵鎖橋折而北經凌城頭
又西至傲城頭與架溪合

舊城土司

八峯山又名元武山在司城內

朱雀山在司治前尖峯獨聳明岑瑛書悅服二字
刻石

嵎嵎山在司東北層峰磊石下有泉源

馱感山在司西南石巉巖有湧泉

嵎藏山在司西

嵎嵎水源自嵎嵎山下一石池仰穿而出秋冬稍
淺春夏漲溢漫流入馱感山

馱感水源從馱感山下石穴湧瀉四時不竭流出
都陽土司界

下旺土司

蓬山在司後與城相連屏翰司治崖半有觀音閣
大王山在司治左層峯插霄

波炭山在司西南有泉湧出日每三潮三汐

壘石山在司治左石壁巉巖

鬼山在司北深林岑鬱有泉湧出於下

崇峻嶺在司治前山勢高拔

穰穰嶺在司治北出磨刀石

淶勞水在舊司治源出淶多山

波炭水源出司西南波炭山下流入舊城土司

穰穰水在司北源出鬼山經司治左與波炭水合
流

安定土司

砦油山在司治西北二十五里山勢崔嵬干霄傍

有石磴嶽崎可梯而上好事者登其巔往往見署
宇臺榭城門啟閉在依稀間內金銀器具輝煌心
目稍萌覬覦之念則陰霾四起雷雨交作凜然不
敢仰視匍匐而下天氣清爽如初歷傳此山為昔
蠻王岑順屯駐之地歿而為神故有此異

隴茶山在夷江洞內

夷江洞在司東一百五十里由匹夫關險仄盤旋
始達其地洞形條直如巷中瀉小水前橫大江

夷江水自東蘭發源入司境由山根湧出流入大河

紅水江距西四十里橫於司治之南冬涸濶僅十數丈霖雨則汎濫汪洋不可度擬通河皆赤上下俱名紅水江惟司之刁河隘地透出一線清流不混為清水渡一河兩名亦可異也江水來自田州多從山竅潛透難通舟楫其源有云自黔南鐵鎖橋來者去則由慶遠之羅墨渡經忻城遷江來賓

而歸右江

韋太村水在司北五十里一水泓然仰出莫測其源

都陽土司

尚層山在司治北十五里山勢高大起伏如虎下有尚巖遠望重巒層疊因名

旦山在司西北十五里山下有洞虛敞清幽怪石林立有石筍石座等異相傳昔有樵者遇綠衣神

人於此端拱對語須臾不見至今遺跡尚在遠望
亭亭獨立如人

強山在司南一百二十里峯巒高聳下有石巖相
傳羅隱曾居此題刻順山隱巖四字故又名順山
邕造山在司治後山勢如屏

六婁山在司南一百二十里一峯矗起

紅水江在司治南二十里水急山狹土民常用獨
木小舟架渡極險

咻邑水在司治西南一百二十里平地有穴濶數丈水由地出初視極澄清可鑒眉髮移時混濁如血久之漸變如米色一日色凡三變流數武匯入咻敬潭

咻敬潭在司西南一百二十里潭濶過於咻邑淵深莫測水從潭底仰出清澈多魚觀者必誠心默祝一時浮躍水面如梭歷歷可數水由順山東注武緣縣河潭側田疇賴其灌溉

古零土司

龍角雙峯山在司治東北二里兩山峙立尖峯突兀狀如龍角山下有古零堡土官岑瑛壘石為垣基址存焉

虎頭山在司南三里山高聳起伏蹲踞儼若虎形山頂有寨名曰金剛亦岑瑛建

紗帽山在司北三里獨立無附勢干雲霄後高前低有類紗帽故名

下勞山在司治左

敦旺巖在司治後偏西四里

荔水巖在司治左偏北二里

司前水自上林界山下湧出迂繞司左由紗帽山
後下注入下遠潭溪澗盈尺亢旱則涸土民常於
溪內掘地聚水汲之

下遠潭在司治後潭濶數丈其水碧澄清澈合司
前之水穿入刁律隘山根

泗城府

凌雲山在府治北極高峻

迎暉山在府西北山勢朝陽故名

餞暘山在府西山形端雅如餞納日

蓮花峯在府北羣峯圍簇登高遠望諸山皆培塿
靈洞在府北崖谷深廣溪出洞中夏可避暑

紅水江自西隆流入府界又東北經那地東蘭二
州入都陽安定司界

澄碧水在府西繞南流注於汾州橋

龍淵水在府北舊圖志在府南一百五十里有神
物踞之

西隆州

三台山州署倚之三峯蟬聯聳峙因名

大雅山文廟倚之

砦雄山守備署倚之

渠達山在州治西二百五十里渾河繞其下

埧樓山在本州甲西南高聳矗天上下三十餘里
風箱嶺在古障甲距州三百五十里嶺上一石形
似風箱故名

渾水河即紅水源自雲南陸涼州來西南入州境
逶迤而東北經巴結甲南繞那貢寨北至埧達山
下板埧塘入剝弼甲流出府界百樂寨

清水河源自雲南維摩州至本州埧達山之北灌
入渾水河

同舍河源自雲南廣南馬別山流出至本州土黃
甲同舍寨之東南流入西林縣界即馱娘江上流
隴高水源自革長甲內山中流出遶扁牙寨東北
合渾水河

西林縣

交椅山在縣治後三里

獨旺山在縣南四十里中峯尖聳石壁峭絕

木龍山在縣西南一百五十里廣南交界

界亭山在縣西北一百二十里西隆州分界

大山在縣東北二百三十里與府分界

晚架山在縣南二十里

潺邕山在縣東南二百里羣峯疊聳茂林幽蔚石

巖有泉

累峯山在縣東二百里平布二十餘里

樣山在縣東二百四十里與府界

夾山在縣東南二百四十里與田州及廣南府連

界

端峯山在縣治前五里秀峯端拱邑之麗山

些猶嶺縣西北八十里巉巖峭壁行半日始抵其
巔俯覽羣峯皆如小阜煙霧常蔽片雲即雨高處
一石穴流泉有聲曲折瀉落居民耕食咸賴之

蒼嶺在縣東二百里舊日土官曾築土寨今遺址
猶存

黃坭坡在縣北一百五十里少木石土色皆黃府

及西隆俱分界

馱娘江在縣西北發源西隆流入境內與淥馱河合流而東至瓦村隘轉南直至田州百色兩岸俱懸崖峭壁中流二大石屹然相峙名曰鉗牙石縫僅二三尺獨木小舟從中穿過水勢絕險陰雨江漲即不可渡

馱悶江源自廣南與淥馱河合流

淥馱河源自廣南出繞縣側至豈角墟與馱娘江

合

直隸鬱林州

寒山在城西北三十里九域志云越王佗夏月遣人入山採橘十日方回問之曰山中太寒不得歸因名山頂建廟有飛來石上書感應龍王四字神姓張能興雲雨旱禱輒應歷代皆賜封號

大容山在城東北五十里峯巒層疊高聳接天界容潯諸境州治發龍於此

榜山在城東北三十里

信石山在城南二里一名牢石坡上有夾石形如側鐘每歲候此石若雲氣覆之歲豐稔

綠鴨山在城西北三十五里厥土青黃治者取以煉鐵

西山在城西四十里其形如樓臺鼓角壤接博白及廣東之廉州

羅漢山在城西三十里石上有巨人跡

銅鼓山在城西六十里近南流江有銅鼓聲聞於

下

天門山在城東三十里即天門關

荔枝山在城東南二十里為州治屏障

鳳凰山在城東十里

登高山在城北五十里

青南山在城西北五十里

凌烟峯在城東二十里獨聳諸峯兩巖中通一望

寥廓

豸堂嶺在城北一里其形如豸上建真武廟

伏牛嶺在城西五十里狀如牛

獅子嶺在城東十五里又東北十五里有龜嶺

推來嶺在城西二十里

五岡嶺在城西三十五里五峯並峙為文筆

兩道嶺在州南十里其峯峭削路分博陸

流山嶺在州北五十里為一州險要

東門嶺在城東一里嶺旁建東嶽廟

水月巖州東南三十里虛明爽豁如琅玕倒垂澗
水出巖中澎湃有聲循澗入洞遊必列炬跨木渡
水石勢益奇聯絡二十八洞最為佳勝

張道巖在城西北三十里又西南為隱仙巖

白石洞在城東三十里周圍七十里道書二十一
洞天

天馬洞在州南二十里兩首昂然對峙石多馬蹄

跡深入二三寸許

釣天洞與天馬相連分上下二界上界軒豁可布
十筵下界臨潭水有石垂垂扣之鏗然清越鐘磬
龍頭石在州前宣化坊內

南流江在州左源出太容山會綠鴨水西南流十
餘里經羅望入定川歷博白合馬頭江至廉州入
海

羅望江又作西望江在州右源出太容山遶州北

西流十餘里會南流入海

鴨橋江州西北三十里源出綠鴨山入南流江

定川江在州西南二十里源出興業葵山入南流

江

橋麗江源出陸川馬坡入南流江

沙田江州南四十里源出博白綠澄崗入南流江

五龍潭在州南三里水深如甃石壁鐫有佛龍神

三字

遊魚洲在南流江中近紫泉俗識曰遊魚到瑞泉
鬱林出狀元

西甌池在州治西晨曉多烟氣上升相傳舊有蛟
出池中

紫泉在州南南流之濱舊名濯纓有巨石伏羣石
間水從石竅湧出四時不竭宋嘉定間忽湧紫水
因改紫泉又名瑞泉明洪武永樂間紫水再出賓
興歲以水出紅泉之數為驗合若符契

七星井形如北斗

博白縣

凝霧山在城東二十五里山勢屹立晨夕雲霧興
頂

宴石山在城西南六十里山背盤石峭立下臨大
江中有流泉相傳南越王宴游處

八將山在縣東一百三十里八峯攢立有颯爽之
狀

鳳飛山在縣東北一百三十里與八將山隔江而峙形如飛鳳

衛公山在城東十里崔嵬聳立為一邑鎮舊有靈應侯壇歲旱祈禱地今惟址存焉

鳳凰山在縣北九十里舊志傳宋時有鳳見此

飛雲山在縣西六十里山峯峻聳時見雲彩流結有扶祿王壇

伏割山在縣城西四十里舊嘗產鸚鵡孔雀近山

有伏割村因名

萬祿山在城西二十里有顯應侯壇

蟠龍山在縣南八十里山峯綿亘層次蟠矯如龍
乳石山在縣城南三十里巖中石乳垂如華蓋下
有流泉

九岐山在縣南七十里迴巒疊嶂分為九峯

綠羅山在城西二十里下有綠珠井并祠相傳即

梁氏故宅

雙角山縣西十五里二峯角立高峻秀麗上有富林侯壇下有金谷園相傳晉石崇曾經其地一水流合容江人呼為綠珠江

射寮山在縣南二十五里高出雲表有應天侯壇早禱輒應

洞房山在縣東十五里下有石洞玲瓏深邃如室宋劉子羽寓此

天馬山在縣西南二十里邑南鎮山

大荒山在縣南一百五十里周圍四十五里上有池相傳有魚曰婢妾如人形生兩翼臍下垂練帶長三四尺搖動有光

木樸山在縣西七十里山勢險峻

凌青山在縣城東南五十里

射丰山在城南五里又八十里為射孚山皆高峻雲流山在城東三十里有泉穴為小白江源

金魚山在縣城南四十里

陵山在縣南三十里下有井水常溫

登高嶺在城東二里九日士民登高之地下有井
泉春時官長常於此勸農故又名勸農嶺

將軍嶺在城西北二里宋狄青討儂智高曾駐軍
嶺畔故名

綠秀嶺在縣東南三十里山勢高廣下有龍潭舊
建龍母廟旱禱輒應

紫陽巖在縣南六十里巖洞清虛上連碧落下瞰

清泉南漢劉崇遠所鑄鐵佛像銅鐘古碑存焉

石鐘巖在縣東二十五里巖如室上圓下方懸乳
若鐘狀扣之有聲

將軍崗在縣南三十里石門三重入崗數武有石
室石田一石如伏龍狀二泉溫涼分兩派石壁刺
南州太守領將軍龐孝泰十字

綠澄崗在縣城北四十里

獅子石在縣南六十里平地拔起如獅子

雞距石在縣城東南三十里山皆石板上有跡如雞距

馬踏石在縣西七十里石上多馬蹄跡

南流江在縣城西二里詳前鬱林州

南立江在縣北三十里源出綠澄崗流經縣北四十里至南流江合流

綠淇江在城東十里源出洞房山入南流江

綠珠江在城西北七里源出綠羅山歸南流江合

流

鴉山江在城南十五里源出凌青山水歸南流江合流

小白江在城東十里源出雲流山與南流江合

浪馬江在縣城西二十里源出木樸山流合頓穀江

飲馬江在城南一里源出登高嶺流經縣治西南畧塘江五里入南流江漢馬援南征於此飲馬故

名

環玉江在縣南一里西流入南流江

浪醴江在縣西六十里源出尚流鄉匯諸水

洗馬江在城東一里源出白鴿埭西流入南流江

頓穀江在縣城西三十里源出飛雲山水歸南流

江合流

銅鼓潭在縣北二十里深十餘丈西岸石壁峭立

舊志漢時銅鼓浮水面響聲遠聞鄉人來觀久之

復沈明弘治乙未邑人獲其一解送制府正德乙亥又得其一送縣今俱失

龍潭在綠秀嶺下有石穴

北戍灘在縣西南一百里馬門灘下唐咸通二年安南都護高駢平南詔師旋經此舟不可行命海門防遏使疏浚至今賴之

馬門灘南流江中勢如奔馬二石峙立有漢伏波廟

溫井即湯井在城南三十里陵山下

文石井在縣治前相傳昔年邑市火井泉湧沸高
數尺邑人藉以滅火官司以聞封曰文石泉大王
綠珠井在縣西十五里綠羅村舊志飲此水產女
多麗色里人以美色無益遂以巨石填之鄒文仲
有詩

北流縣

大容山在縣城北二十里詳前容縣

筆架山在東南二廂離城十里三峯聳峙狀如筆架因名

綠藍山在西北吉京里離城三十里乃大容山之東一支山也

雙威山在縣東南二百五十里思賀江源出其下銅石山在縣東十五里層巒秀麗上有靈池中有石如鯉泉從魚口流出冬夏不竭舊產水銀硃砂金龜山在南二廂離城一里許高數仞山豐隆如

龜形因名

花石山在縣西南二十里其嶺有石散布如花
印巖山在縣東去城一里許四畔皆平中突一埠
有紋如印

勾漏山縣東北十五里石峯千百皆矗立特起其
巖穴勾曲穿漏故以名山又嘗以名縣道書為二
十二洞天葛洪求為勾漏令修煉於此

會靈臺山在縣東二十五里臺高百餘丈崖嵯峻

險由絕壁攀援而上元至元四年縣尹陳楠建亭
於山巔有飛泉貫崖而下東有龍井遇旱祈雨多
應

望夫山在東坡地離城十里

天門山在西二廂離城十里

白雲巖在縣東北十五里巖中有佛像題咏

普照巖在勾漏山如覆釜登巖却顧黃坡翠巘與
石峯相間燦若幡幢交錯翻翻欲動

獨秀巖在普照巖西洞宏邃石室廣高六丈乳石掛壁有彌陀大士像

通津巖在縣南埧鄉有清溪自南而入從北流出石山對峙如門故曰通津

會僊巖在東小二里離城二十里

勾漏洞勾漏山洞有十所曰靈寶曰寶圭曰白沙曰玉虛曰韜真曰普照曰獨秀曰玉田曰金龜或^絲斷或連皆幽竒怪異迥出人寰洞前有小亭俯瞰

橫塘倚欄四顧列峯迴環秉燭而入有丹竈床几
盤甕礪白皆石乳天然凝結塘前水草間產葛仙
米夏月可採而食

白沙洞勾漏山秉燭從竇入凡經六七竇行里餘
乃至勾漏奇甲天下此為第一

玉虛洞在勾漏山洞中物象皆瑩潔如玉每雲從
洞出則雨風從洞入則霽舊名念經窟觀衝洞吳
元美改今名

玉田洞在韜真觀西洞闕三門中門明廣可入其中田數畝有石花如玉色田後二石池中有小嶼水潛通江

景星石在寶圭洞山巔孔穿望之如星

雙女石在縣東二十里銅石山旁舊志宋初有縣民生二女性孝謹春月養蠶嘗以一女奴相隨採桑里有來議親者則愠怒既而父母以其年長密以許聘里人二女知之詰朝沐浴更衣托採桑為

名登山立化為二石人其母往觀之女奴猶立二石傍云

穿鏡石在縣西十里空圓如鏡故名

鵝公石又名嵒石山在縣南八十里近水北一山對峙為鵝母石形皆類鵝因名

綠藍江在縣城東源出綠藍山分二派西派至冲龍里由平安江達康州入海東南派經落桑橋入繡江

思賀江發源雙威山下流合香墟經縣西南入繡江

圭江源出大雲嶺經羅皂出大坐坪至定良村會思賀水合香墟水香墟有三源一自石鼓嶺經安樂垌出雞兒坡一自那樓山出南綠一自天塘山出充隆三水合流至縣城西南是為圭江之水又登龍橋水在黃嶺山發源順至城西遶城北經通仙橋出廣濟橋合圭江水又落桑橋水由烏巢山

發源乃大容山之東流經冲龍里中村至大里村
合都隴里水俱出落桑江會圭江由容藤而至大
江又有平安橋水去縣西北三十里乃大容山之
西流入平安江經茂林橋合鬱林博白諸水達合
浦縣入大海

葛洪井在勾漏山相傳葛洪於此洗藥久湮惟石
盤石

聖水井在靈寶觀內其水甘冽一名文石井

陸川縣

鳴石山在縣西十里一名石鼓山一名天馬山山形聳峻如馬半山一石擊之其聲清越寰宇記載董奉仙後有人見於陸川鳴石山中即此

白羊山在縣東北二十里山多白石四面孤懸上有飛泉下產勾芒木土人取木皮績為布

大這山在城東南三十里高峻通化州

石湖山在縣西北二十里一名石袍山高數十丈

巉巖峭壁上有一池澄清而深雨後山色晶瑩望
似積雪

文龍山在城東十里下有小溪水流遶城市

石羊山在縣西南三十里小石碁布伏如羣羊

荔枝山城北四里有荔枝林芳翠襲人夏月可避
暑

三台山在縣南一里峯列如三台向學宮

金坑山在縣東南十里下有溪流不絕沙黃如金

山頂建金華寺

文黎山在縣南五十里

後陽山在城北一里綿亘起伏為一邑之勝山下有報恩寺元妙觀今廢

分水山在縣北五里山下有二水一順流十里至縣城東一返流十里合米塲河流入鬱林州界鳳凰山在城西十里似鳳凰翔舞故名山頂有石盤泉出其中

謝仙山在縣東三十里分列八峯山頂一潭鯉魚
盈尺山中多產四時果實世傳謝仙得道於此

雙流山在縣西南二十里

六穿山在城北十里一石壁立如碑上穿六孔故
名

黃箭山在縣城東北六十里

東山在城東三里喬木蓊鬱邑人龐穎曾構亭其
上

大水山在縣東南四十里山勢延袤直接平南藤縣界

伏波山在縣西南四十里

馬旭山在縣城東南三十五里

鶴垌山在縣城南三十里

石山在縣城北四十里

簫韶山在縣西北四十五里

路崗山在縣西北四十里

大挾山在縣西南七十里

繁龍山在縣西南六十五里

雙角峯在縣南三十里又名雙峯山

奎嶺在

關

龐姓建書樓於半山號聚奎齋因以

名嶺

黃嶺在縣西北四十五里

登高嶺在縣東北四十里有泉出其下合迴龍黃

箭諸水

田子嶺在縣北五十三里

妙洞巖城東八里一名東山巖又名瀑布山高三十丈中有一線南流合妙洞水

水車江在縣南二十里源出金坑山合縣前河入海

迴龍江在城北十五里合黃箭登高二水流經米塲出馬坡入鬱林下廉州入海

下浪江在縣西四十里源出田子嶺流入博白縣

界

龍化江在縣南五十里合平南水通伏波灘下石

城縣入海

妙洞江在縣南一里源出妙洞巖

路崗江在縣城西北四十里出鬱林州

崑崙水在縣城東三十里源出謝仙山合六潭水
入北流江中有石似崑崙故名之

六潭水在城東二十五里源出謝仙山合崑崙水

入北流江

平南水在縣南三十五里

黃箭水在縣北二十里源出黃箭山流合迴龍登

高二水入鬱林州

分水出分水山仙靈宅窟也

伏波灘在縣城南四十里岸左有伏波廟即烏江
下流

靈泉在城西南五十里石竇午時出泉時過即止

溫泉井在妙洞水旁泉自石竅中出四時溫熱冬亦可浴舊構有亭為邑士夫遊觀之所今廢

興業縣

葵山在縣北十里峯巒秀拔山半有巖雜樹交翳煙雲恒集其上有龍井世傳邑人蕭某者於此修煉得道後為洞庭湖主云

三台山在縣西五里三峯聯屬秀拔莫倫

北斗山在縣北十里七峯綴峙形似北斗故名

東斗山在縣東十里與北斗山相對

鐵城山在縣南十里其色如鐵中平衍外石壁險固如城上多石竇泉流不涸三面無路惟東有路可通人行門前石上有二牛跡宛然南有基約四丈名敵樓傳古避兵處

綠陰山又名甌山在縣南二十里喬木凌空下遶清泉

文筆山在縣西南二里山勢挺出如卓筆狀

萬石山在城西南峯巒錯落如累石然

苟翁山在縣東二十里樹木叢蒙

翻車嶺在縣北二十五里羊腸徑折險峻難行

白馬嶺在城北一里

黃嶺在城東南十里高數萬丈

白馬巖在縣西二十里常有白雲覆頂遠望若馬形內深廣有小洞隙光透天如窓牖下有泉出

太上巖在縣南十里層崖邃穴有水可汲內供老

君像有石筍若人形一石曰無鑿痕巖上多古木
參差類屏障青翠不彫

古州巖在縣南二十里巖半有潭四時不竭東折
一洞有石懸下如鐘扣之鏗然

石掩巖在縣西南四十里上有巖石狀若浮屠前
有石掩之若扉闔不可入世傳藏仙丹圖籙之所
人欲啟之石動欲墮遂止

吐華巖在縣西南三十里內外二洞相通深潭清

澈魚遊如織洞有石鼓擊之響應

牛隴巖在縣南十里中可容百牛居民冬時常驅牛入巖以避寒氣

黃桑峽在縣西三十里嶺嶂遼遠界廣東靈山縣龍穿江在縣西十里源出葵山東南流二十里由山下石穴中過傳有龍穿其山水因通焉流經縣東入鬱林定川江

上鳴水江在縣北十里橫石灘源出葵山合流龍

母江共二十里

下鳴水江在縣東二十里縣境諸水匯流巨石突起橫距西岸灘瀨飛激聲若雷世傳科試之年中有沙嶼浮起即有中式者

龍母江自上鳴水漸折而西繞縣北翻車嶺下兩崖森翳一水流旋西北經九十里入貴縣將軍江
通津江在南門外即新江明知縣吳日乙開
通濟江在東門外源出葵山合流於鳴水江

馬山江在縣南八里自龍穿江分流而來與下鳴水合

慕思江在縣東北五里南流入通濟江

岑江亦作清江發源葵山東流經縣東曰通濟江
匯慕思江水繞縣東南分二流一經城南西入龍
穿江曰通津江一西南流經縣南八里曰岑江亦
流截龍穿江西南入廣東廉州府界

古州潭在縣南八里石巖下澄澈可鑒

蛟龍潭在縣西三十里相傳石巖中有蛟龍盤蟄
四時陰靄

博泉在縣南二十里南漢封其神曰龍母夫人宋
熙寧中封濟惠夫人有廟

龍灣在縣東十里深澄不測匯下鳴水

石井在城西井泉清甘石澗屈曲中可流觴

玉井縣北十里塘山村前水清冽昔傳晉葛洪為
勾漏令望井中紫氣知有丹砂採之而去

廣西通志卷十七